

畿

輔

人

物

志

畿輔人物志卷之十一

壯平孫承澤著

賀給事欽

賀欽字克恭遼東軍籍少穎敏沉厚好學偶得近思錄朝夕玩讀探其旨要中順天鄉試以成化二年舉進士爲給事中一介之饋非義不受取孔子鄙夫之言題於壁之數拉條長言事不從嘆曰人情如此吾行吾志至己四年旱災抗疏條畫并自劾求退不允陳白沙獻章應聘至京欽與論學嘆曰至性不顯寶

藏猶霾世卽用我而我奚以爲用卽上疏解官執弟子禮見白沙謂公曰君言議侃侃無露鋒鋷要須和平沉深公輒用自戒杜門潛心聖賢經書以次涵泳精思實踐推所得以淑諸人弘治初薦授陝西叅議以母老懇辭具陳四事一曰資真儒以講聖學二曰薦賢才以輔治道三曰遵祖訓以處內官四曰典禮樂以化天下報聞允辭正德四年劉瑾下括田令東人驚疑義州守臣更貪虐遂囂然聚變顧相戒曰毋入東街驚賀黃門因徃諭曰汝當悔顧未晚也第不

殺人可解罪有官兵至長跪求生而已已撫鎮人領
兵至且言大勦衆復呼諫曰賀黃門無謾語趨跪里
門又諭曰城中擾亂至此鎮城焉得不發兵第不殺
人必宥無恐衆遂定爲學不務博覽專讀五經四書
小學靜思默識反身實踐冠婚喪祭遵用家禮每教
人讀白鹿洞規小學鄉人化之興於行義老更好易
究心象數手不釋卷其卒也鄉人祠之凌溪釣臺言
行錄八卷唐荆川稍加校錄刻於遼東別有漫記一
卷遼東地屬燕并公以順天鄉闈起家故載之畿輔

志中按醫閭先生之學以誠敬爲門踐履爲實及登
進士與一峯楓山互相倡和以千秋自命追見白沙
遂壯面事之病而告歸載其肖像以往尊奉不衰然
其所以立教者每以東萊格言文公教條爲學之總
括戒學者不讀小學無留館下又謂陸子靜天資高
有簡畧細微之病吳草廬聰明博學無躬行切實之
思不全依傍白沙者也故胡敬齋之于康齋醫閭之
子白沙謂有出藍之譽可也崔後渠先生曰蔡秀夫
奇醫閭集讀之曰賀子篤志君子也然慕陳白沙也

甚切嘗聞白沙謂賀子少自得宜誦佛書賀子不從
夫賀子忠孝廉直履堅而安亡所得者能之乎儒者
盡倫而已必棄日用之務杜門合目悟入陰界名曰
沙門可爾胡可附吾聖人之教哉其推尊先生如此
先生又嘗東羅一峯云士之進退各有其道苟退而
無所為耳自頽靡其視進而尸素者一間耳此千古
名言余借之以自勉焉

蔡詩御發

蔡毅字天章人稱浚濱先生真定府寧晉人少穎悟

過人年九歲解文義從莘縣李教授講經書卽能搦管作驚人語然以時文浮艷不好也繼從晉州張恒山學留心性命之理毅然以斯道自在嘉靖己丑中進士授行人司行人從韓苑洛湛甘泉二先生講學甘泉先生稱其體認力行不尚言語時講學者推公爲領袖出使大同代藩及督鎮劄有饋遺俱屏不納旋京言防邊事宜人稱其確見又出使東粵與倫氏昆仲講學數月見陳白沙後人式微爲置祭田六頃俄改授浙江道監察御史巡視東城禁革太倉夙弊

發勲戚不法數事禁約三院人與夏宗伯言徃復辯
論不屈繼差查內庫劾太常卿陳道瀛宋內監侵盜
奸弊光祿寺侈費及山西大木廠冒破之弊風采颯
然上重之差徃南直刷卷發鎮守大璫王德留守王
桓諸人侵盜夙弊帶管巡鹽上疏鹽法利弊請復飛
輓之法以實邊儲查復武林宋武穆後人岳清西河
祭田三項處置太康縣都御史顧佐祭田三項繼巡
按河南首制勢要豪強及新鄉張戚晚奪占民田等
事禁約趙藩宗室豐樂鎮等處私店奉勅鈴束鄭府

廬江王叅奏唐府宗室宇淙及周府將軍數人不法
事皆發高墻禁錮發儀賓武永光豪惡復佃戶任世
連等田業並冤枉得釋共平反八府寃獄二千餘事
行文脩理各府州縣文廟儒學立書院一十七處取
學行生儒延名儒教之脩南陽諸葛武侯祠固始忠
節許達祠墓表揚河內侍郎何瑋建立生祠脩復南
陽汝寧漢召杜水田及各屬州縣水田二萬頃表揚
杞縣史烈女等節義十餘事是歲監臨鄉試稱得人
築睢州寧陵護水堤白餘里脩築銅瓦廂趙皮寨黃

河堤岸二百里及新鄭護城堤救完寧陵縣城不爲
河水衝決收移新孟津縣奉勅疏濬運河工完勅賜
金幣褒獎捕獲尉氏及裕州反賊高寵等準問大家
猾永城蔣輔習淮虛氏杜田殺人賄賂三十事河壯
涉緣地坐以濶布寬減田糧十餘萬石裁減驛遞設
米十餘萬石是歲旱蝗行捕蝗之法查埋各府州縣
庫銀十餘萬各省糴粟七十萬石船運分賑八府災
傷復命劾奏貪酷官及考覈罷黜二百餘人一路風
清然而側目者亦多矣回道論事下獄尋釋又論吏

部注尚書鉉革職回籍中外薦舉三十餘疏吏部許尚書論疏請同御史楊爵浦鉉起用公以母憂未滿辭逾三載內促之抵京改河南道考察內外官及勘本發刑科及山西道侵盜之弊吏部以年資議陞京堂公辭之復論事下錦衣獄與楊爵劉魁同時被繫復爲柄臣中傷革職回籍一特公論沸然不平中外各官舉薦如向時公絕無出山之志矣家居閉戶教授生徒本縣及臨境各省歷年來學者約三百餘人乃建書院於浚水之陽置贖田三十頃以給生徒及

合族婚喪祠墓時祭之需郡守爲建浚濱書院石坊
提學于御史建正誼明道敦義崇道二石坊都御史
霍公建有道之士石坊都御史毛公建德學耆儒石
坊中丞李公建清朝耆碩坊節年各道及諸司遺公
脩坊之資屢置田數十頃勤力耕耨收穫日漸饒裕
遂將祖產讓與兄弟及諸姪孫凡親戚有不足者量
爲置田產收養孤貧爲之婚嫁故友妻子有不得所
者亦量給田并賜恤之後以數年所積大爲脩建文
廟儒學以隆追報之典置儒學贍田三十頃以助貧

生婚喪邑郭外置小學三處贍田六頃延生儒以教
貧家子弟舉行鄉約期望偕諸父老率其子弟至小
學中拜聖諭教之爲善百尺溝鄉去城市遠僻俗稱
難治以舊宅一區改爲小學割田二頃延生儒教子
弟舉行鄉約規格與三學同備養濟院一所養濟田
四頃令孤老每名口收養貧兒一人置貧兒田三頃
義塚三段地各數十畝以待孤老及貧家無葬地者
古鄉賢墳墓一十三處共置祭田五頃各令族人
生儒供祀巡按楊御史嘉公之懿爲建生祠以爲報公

上書懇辭因以撫按及提學巡關巡鹽管屯諸公兵備陳公所遺脩建之資建堂齋書舍五十餘間改爲正學書院以處遠方來學之士置贍田十頃以給之歲癸丑大荒公出家貲遠方糴穀以賑三族及生徒故舊壬戌復連荒公力行不倦賴之生活甚衆復教鄉民聞滄陽河及洩河溉田數千頃地方官議立石閘衆殫於物力公慨捐家資建閘三所復設藥市一區以通醫老儒修合藥餌以療貧者公自奉儉素不嗜聲伎凡有積輒散之且檢身甚嚴雖一字不入公

門教人以甘泉先生二業合一之訓以躬行孝弟禮義爲本鄉里有無賴者公不與校常曰但求在己無失在人者所當恕所著有四書埤傳書經便註汶濱文集語錄等書行世及公之歿遠近痛悼幾爲罷市撫按下檄府縣祠公正學書院稱先生學有淵源望重山斗昔立臺端而正色稱鳳鳴於朝陽今居鄉間而表儀擬鴻漸於雲路飾黉宮講院明正學而振起人文置贍地祭田惇古風而主盟吾道頓使汶水接洙泗之分流恒山識尼丘之正宗此其功德之著在

當時而血食之允宜享報於後世也人以為實錄云

孫閣部承宗

孫承宗字稚繩別號愷陽保定高陽人年三十二應選貢又十年登萬曆甲辰進士廷試第二除翰林院編修十二載遷左春坊中允曆左諭德司經局洗馬天啟元年遷左庶子克日講官拜詹事府少詹事加禮部右侍郎日講如故萬曆末兵事孔亟舉朝欲以戎務屬公至天啟二年經撫不協相率潰奔人心洶

洵乃拜公兵部尚書兼東閣大學士凡九日卽命以閣臣擬掌部務疏請下熊廷弼王化貞干理人爲聳然兵部尚書王在晉出爲經畧欲築重閔於山海費一百二十萬閔門僚佐袁崇煥孫元化力爭不得投揭于內公請往視面詰在晉縮朒爲失策及還面陳情形上召還在晉議代經畧者難其人公自請往遂以原官督理閔城及薊遼津登等處軍務辟職方主事鹿善繼王則古贊畫軍事抵閔營壘一新躬親環甲巡歷山坳海澨常至竟日不食竟夜不寐勞弗恤

也既而督臣王象乾以憂去公上奏請罷推願以身兼以省防撫之紛紜且曰臣所奏督撫事宜乃祖宗舊制原無薊遼總督只督薊不督遼只督款不督兵與其若有若無誤國兼以誤身不若盡心盡力捐身或以報國衆忌之言官爭以總督不可罷兵部附合之乃推吳用先自宣大改任而內與公大相左矣遼撫張鳳翼恨公不用矣遼守閑之說託人極論馬世龍貪淫詆公不當誤用世龍以壞遼事公請勅廷臣雜議因推明世龍得諺之由並請罷斥薦兵部尚書

趙彥自代彥閉門而泣囑人告哀於公上促公理事未幾有柳河之挫乃堅請放還上允之加官廕子行人護送如例王在晉入爲本兵力言馬世龍茅元儀熒惑樞輔敗壞閔事又囑言官交章詆公以沮其出崇禎二年京師戒嚴衆謂非起公不可詔起原官改兼兵部尚書抵京召對留守京師公乘夜出閱城隍得旨馳赴通州抵通未久又命移鎮山海公至閔使人沿海入報內始知閔門尚在及四城之復加太傅力辭不受時梁廷棟爲本兵不悅世龍劾之又謂復

城之功出自監軍丘禾嘉孫元化二人俱從優叙公
連章求罷衆欲聽其去以遼事倚禾嘉上不可使中
書詣關門諭令視事未幾有凌河之失公以十七疏
求斥令馳驛還已而以長山之敗追論矯旨復城欲
中以危法上不可命冠帶閒住削世廕公具疏陳謝
並奏薊遼事宜十六款且曰臣願治臣進兵敗劔之
罪不宜以兵潰卸罪於進兵使天下以進兵爲戒也
臣願治臣不能制勝之罪不宜以兵困卸罪于復城
使天下以復城爲諱也公里居七年及鹿太常之歿

賦詩六十章哭之後高陽破公亦死之奏聞復官予
祭葬先是天啓中公在遼逆璫魏忠賢已用事上遣
內侍胡良輔等齎白金蟒衣賚公出內帑十萬犒將
士且以內府噐仗給軍公執奏曰中使關涉兵政自
古有戒邊人竊見皇上不遣主兵大臣而獨遣治兵
內臣又遣不一人而四十餘人私相擬議一謂上特
重邊人勞親近以慰勞疆場一謂上或不信邊人遣
親近以體察情形兵不可嘗典或以美而成駭例或
以暫而爲久天下不明皇上過信大臣之心而或疑

皇上有不信大臣之心是皆足以害政臣願皇上嚴
於兵事處飭使臣令其宣布德意無遂以此行爲嘗
無遠以觀兵爲威福上得公奏溫旨報是時逆奄方
用事朔內操所遣皆提督內臣已寓中人觀軍之意
公故抗章逆折其機牙公方禁宴會輔等至具杯茗
而已輔等亦惴惴將事莫敢謹昨其後逆閹分遣諸
閹監督關薊海外必待逐公而後發蓋閹之憚公深
矣公常西巡薊昌諸關隘密邇京師請以十一月十
四日入賀聖壽面陳機宜內閣魏廣微急告忠賢曰

樞輔擁關兵數萬清君側兵部侍郎李邦華爲內應
且亟備之忠賢大怖繞御床而哭上令內閣擬諭止
之顧秉謙奮筆曰無旨擅離信地非祖宗法度所宥
兵部馬上差人傳諭樞輔馬首卽東半夜召兵部入
分三道飛騎止公公見諭卽刻東行忠賢遣人偵之
一襖被置輿內後車惟鹿善繼從實未有一甲士也
忠賢之意少解廣徵乃嗾崔呈秀徐大化李蕃連章
劾公至比之爲王敦李懷元下九卿雜議吏部尚書
崔景榮訟言重臣不可輕去乃遂有令公視事許小

進謀謂樞輔擁兵市重宜削其兵柄兵科李魯生上
簡汰之疏使兵銷將衰可以殺公也公遵旨汰大帥
三四人兵一萬七千三百餘人累疏求罷不得其疏
有曰臣故孫慎行所取士而高攀龍左光斗之所常
薦引也義不當幸指擿未及自爲譴啞以姑容於天
下又先以趙南星高攀龍之去上疏曰兩臣之驟驟
者去而臣幸留臣其有遺行有愧於兩臣使臣不蚤
自裁決他日求如兩臣之去何可得也人讀其疏爲
之咋舌公常曰先帝以漢武鄉唐晉國擬我我則何

敢成敗利鈍非所逆觀生老病死時至則行或竊比
二公乎公有文集奏疏百餘卷范公景文刻之南中
隨燬然公不以書傳也

鹿大理善繼

鹿善繼字伯順保定府定興人爲諸生時岸然以千
秋自命萬曆丙午舉於鄉過容城與同社友切脯酌
酒唏噓楊忠愍墓下癸丑舉進士與吳郡周順昌吳
橋范景文襍被蕭寺鷄鳴風雨以節義相期勉選戶
部山東司主事職鹽法與同舍郎袁世振爬搔利病

洞悉源委世振後疏理兩淮卓有成效著爲絜令焉
丁田恭人憂服除補戶部河南司主事署廣東司事
遼左方缺餉請發內帑不報會廣東解金花銀至公
奏記大司農李汝華曰每歲廣東解金花銀恭進大
內此近例也頃督部有扣留之議此時仍進大內則
部議終成盡餅欲徑解太倉則俞肯艱如拔山莫若
題留爲便考會典初金花銀折糧俱解南京供武
臣俸祿各邊或有緩急亦取足其中正統元年始改
解內府歲以百萬爲額嘉靖三十二年題准三官子

粒及各處京運錢糧不拘金花折銀等項應解內府者一併催解貯悉備各邊應用不許別項那借夫曰緩急取足是內府與外府分用也曰備各邊不許那借是備外府專用而內府不得旁分也今邊烽告急軍糈乏用卽舉金花全數一旦復還太倉亦率由祖制非奪大內所有而益外府也唯是皇上批發度之高閣而中官熒惑其間急難得旨一面題知一面劄納銀庫轉發遼左權自外操不至如帑銀之緘滕不可問天下事爲之有機留與不留係於進與不進此

際間不容髮萬一宸怒不測請以身任罪不然局外者方議留而局內者且議進無論清議不可卽主上視吾輩何如也司農如公議上請上怒奪公俸一年勒令補還司農不敢違公力持不可謝恩入朝中官閤門不聽公出勒問太倉云何管太倉主事劉榮嗣報曰發三日矣然實未發也中官傳嚴旨促令補還公曰有銀何用借無補又安用補中官愕眙不能應公曰但執善繼語回奏死生唯命不敢易一字也中官嘆息而去無何堂官奪俸二月公降一級調外任

用舉朝交章請留不報擬降山東運判亦不報遂移疾去而司農竟如數補進嗟乎金花不可予邊而他賦乃可補金花忽而扣留忽而補進漫無執持奈何不令人主厭薄臣下也光宗御極首復公官管新餉改兵部職方司主事是時遼陽初陷中外震動公受事誓天淚流浹面杜絕請託申明法紀爲大司馬草疏請逮某斬某以申國法法不能行請自臣始言官群噪之公抗章力爭無以難也大司馬以撫賞行邊請用廢弁坐賕敗者職方郎耿如杞持之不肯覆司

馬疏爭之奉旨司官不得違阻公上書內閣葉向高曰邊疆之壞由於債帥中外諸貴人入其債而請求於職方職方自愛其官不得不徇諸貴人之請今幸得一憂國奉公不徇情面之人反奉不得違阻之旨胥天下以職方爲市永無不債之帥者自此一言始勿謂違阻之司官爲易得勿謂去能違阻之司官爲小失也葉公得書初怒其刺已旣而屈服焉壬戌孫公承宗以內閣理部事孫公清嚴果銳以天下爲已任請寘逃臣熊廷弼王化貞於理公舉手加額遂委

心焉從孫公闕闕以歸孫公自請督師公請從時吏部司官缺太宰堅以屬公公不可曰相公一日在師中卽一日在幕中鹿善繼髯鬚如戟肯回頭作吏部郎乎孫公當闕四年入而造膝密謀出而指授二三大帥實倚公爲左右手禁餽遺絕宴會朝壑暮塩漠然兩書生也布衣瘦馬出入亭障問延見老校退卒與相勞苦于以勾稽將士察讖營壘鼓勇敢拔跡跡錄寸長理小過二十年名將咸閣部之甄錄公之力也孫公自寧遠還鎮屬公入都門催軍需甲仗已事

而還去家二百里不遑省視中朝自此知開門整頓
一新而沮抑之謀百出矣十二車營成孫公將渡河
人奏魏廣徵誑以清君側聳逆奄矯旨趣令歸鎮李
蕃李魯生輩進謀於奄議省餉減兵以陰撓之公貽
書兵垣曰遼之當復非直以故有之封疆不宜委敵
無遼則不能有薊衽遂迫於京畿也今之持論者大
端有二一曰慎重一曰簡汰夫進取則當慎重振刷
則宜簡汰而今之君子則慎重非爲進取意在退怯
簡汰非爲振刷意在隳兵而總以巧行其阻撓恢復

之計夫百計而鼓之進不能勝一言之退也三年而
集此衆不能供一日之隳也不征不戰去將去兵垂
成之緒旣廢前日之衽復作遼廣潰陷時都門之光
景猶能記憶否身在事外之朝士以隔壁之猜而索
遼人之情心在事外之遼人以一面之詞而迎朝士
之意索遼人之情者遂持遼情以爲朝論明朝士之
意者因借朝論以撼遼情忠臣義士有負戟長嘆而
已未幾孫公解兵柄公亦移疾乞歸家居四年起尚
寶卿陞太常少卿管光祿寺寺丞事未三載復請告

歸崇禎九年七月東兵破定興公死之贈嘉議大夫
大理寺卿其子解元化麟以毀瘠死於喪次公歿孫
公哭之慟爲挽詩六十章又二年高陽陷孫公亦死
之

畿輔人物志卷之十二

北平孫承澤著

李文康時

李時字宗易任丘縣人弘治壬戌進士改庶吉士嘉靖三年進侍讀學士尋陞禮部右侍郎四年三月纂脩獻廟實錄命時與吏部右侍郎溫仁和爲副總裁四月時言頃者仁壽宮災詔加脩省然中外臣工未有以奉德意者議禮者幾於聚訟催科者甚於繭絲希進趨權倖之門在位乏羔羊之節習於世祿鮮克

由禮抑於冤獄多所未伸邪正雜居名實未核凡此皆足以名災致變而諸臣方且佞諛成風以言爲諱忠鯁之士有懷欲吐思及罪譴輒復中止乞廣求直言令指實敷陳以祛時弊章下所司尋轉左丁憂七年起戶部左侍郎復改禮部八年陞禮部尚書九年時議姚廣孝在文廟雖有帷幄之功而崇秩顯爵已償其勞今以削髮緇流配享太廟實所未安乞移祀大興隆寺從之十年加太子太保三月時言各處鄉試巡按不得收取遺才不得與主考較禮儀不得徇

私聘取房考官從之會浙江巡按李佶請經房闕得
雋卷仍發監臨叅閱公同去取時言若令叅閱去取
則失祖宗糊名易書之法亦非救弊補偏之初意上
深然之九月名爲武英殿大學士叅贊機務十二年
帝幸南內名孚敬時等閱馬觀花賜蟒服上製古樂
府七言二章命各和以進復同遊西苑製七言五言
各二章命和十三年五月上幸南內名孚敬時隨行
賜扇及酒食復留閱宣宗輿地圖時及御和詩十四
年三月復名同遊南內時等各作奉制記樂賦以獻

帝亦作一詩命曰御製記樂同遊命刊示羣臣本年
加少保進少傅兼太子太保吏部尙書謹身殿大學
士十五年端午名時同夏言郭助泛舟西苑命蕩槳
近龍舟被顧問賜宴無逸殿翌日時等謝表以爲自
宣宗賜蹇義同遊萬壽山楊榮同遊西苑後迨此乃
再見云九月以寶訓實錄成加少傅華蓋殿大學士
十七年十二月卒於官贈少傅諡文康李公受事於
張文忠孚敬才相之後無所表見於世然斥廣孝從
祀一事侃侃正論矣

方文端從哲

方從哲字中涵順天人賦性醇厚不事脩飾爲司成時大璫田義有姪入監甫三日卽欲撥歷持之不可義怒使人語之曰若不愛官耶何此小事遽相拒絕遂請告去家居最久時神廟倦勤中外隔絕朝臣水火公與葉福清同居揆地葉曲爲調劑時望歸之旣而藥去公獨相口語藉藉適紅丸議起孫宗伯糾公謂藥爲公所進例以許世子爲弒君當誅下部議公上疏請投之四裔以謝人言高陽孫公承宗乃宗伯

所舉士昌言于閣曰進藥不止一人實出聖意當之
曰弑非律令也庸醫傷人有罪况萬乘乎李可灼當
論如律平人父母疾革誤藥而傷歸怨長子長子之
失主張理也從哲宜受長子失主張之罰宗伯恚以
爲反已而庇從哲然人以為公論韓蒲州曠亦出揭
謂不宜苛求公歸而杜門却掃不問戶外事未幾逆
璫借紅丸一案以處諸君子浙人徐大化欲乘此以
起公公不應至崇禎戊辰以疾竣祭葬從優諡文端

李文敏國楷

李國楷字元冶高陽人登萬曆癸丑科進士公器度
宏遠風格澄峻與孫劉陽先生同里少時卽師事之
故品識恊相類劉陽先生每亟稱之當癸丑館選時
劉陽先生謂公曰君能辦廿年博士弟子乎公曰自
今一如未第耳劉陽先生擊節其言是年入讀中秘
書蔬食布衣意泊如也丙辰授檢討晉諭德管國子
司業值熹廟幸太學坐講易發明天人大義上恭己
注聽及以庶子充經筵日講官次講尙書每借經發
明時政上已目矚心嚮矣閣員枚卜名在第八上持

簡入閣辦事咸稱得人時瑜患已張公慮切濡首兩
疏控辭其辭疏云天災物異縣寓未寧又云須使天
心感格國步清夷時瑜方侈謂身致太平有頌天與
人歸者公不忌也其謝疏云妄意名節之重絕無恩
怨之嫌身欲曠然立于四虚心欲鄙然周乎六幕又
云舉世無不可用之人而不必同于已天下無不可
爲之事而不必有其功又云恩威出于明主或藉之
以行私職事隸在諸司或干之以行意吳悞博長厚
之名偏執冒介勁之聲惟便身啣罔恤國是侃侃正

論讀者爲之咋舌公在閣當逆璫以伯爵謬干公正
票以指揮使又以狡謀劾三戚畹予以劉司隸得不
深及之又恨楊忠愍之指爲一罪也復以劉志選劾
張武清特重恚以撼官闈公極言子不宜佐父難母
而况無間之父母武清得不重譴而罷邑令唐紹堯
以執法強項逮下司寇獄坐贓幾千金公明其事而
仍婉爲解令得釋輦下建逆祠不捐不謁有挾璫以
請者公屏之不見璫欲建坊於里鐫忠臣印勒天下
槩爲祠遂有疏茅土不足封者璫一一效莽新試天

下其乾子義孫輩亦無一不效美新至今史臣撰述
功德告廟藏之金匱以璫希名言假上傳得公持不
可而寢有媚璫者獻廓清之策欲殺御史方震孺等
公力執之不得會殿工成公援肆赦以停如朱童蒙
等之奪情魏良卿等之謬封公俱擬不可而璫以上
傳行之彼時每歲敘功如皇極殿成如甘鎮捷如延
鎮捷錦州捷三殿成虬蟒犀玉充斥班次公無不疏
辭再四故趙夫人之喪終歲歸里而不一乞卹則公
之介操凜如矣蓋公雖不與璫顯相齟齬而處晦而

明卒不失其正公之見遠矣故逆璫旣戮上召閣部
諸臣令定附逆諸人之罪初案無黃立極施鳳來張
瑞圖諸人之名上怪問之閣臣對以諸臣無諂附實
跡上舉某以某票擬媚某以某閣揭媚某以善書爲
其勒碑媚何謂無實蹟而獨不及公蓋上在藩邸時
諸臣情狀察之甚悉而公固久鑒知于上矣然公不
以自安也因國子生胡煥猷之疏公自訟曰昨年七
月先帝拔臣講席之次適逆焰方張謬謂忝跡鉉路
或可挽救不謂竊柄銜憲動借上傳以行今年五月

決意乞歸值敵患孔亟繼以先帝違豫旋忽奄棄羣臣然引慝避位賜一日而九迴回思一年之內猘獠與居虺蝎與處種種憊尤人非鬼責無地自容上溫旨諭留又疏云自恨待罪台司上之不能如申屠嘉之困鄧通韓琦之斥任守中次之不能如望之死于弘恭陳蕃死于王甫悱惻城社薰灌力窮妻歿經年歸骨下里絕不徼求卹典避遠權墜之私憐其情可知也上仍溫旨慰留元年二月以病乞骸者二三月力辭者四四月五月具疏凡十有一始得允放遣行

人護送賜賚路費綵緞地方官以時存問給廩米與夫公益受知于上者深矣公在新朝獻納頗多而其最著無如十事之疏一曰勵必爲之志二曰務典學之益三曰執總攬之要四曰廣聽納之方五曰謹內侍之漸六曰崇節儉之德七曰覈職掌之實八曰精用人之術九曰恤下民之苦十曰脩久任之法鑿鑿宏議古之名疏何以加焉惜未竟其用也歸時仍薦韓蒲州熿及孫剗陽先生承宗尋俱詔用蓋從公之請也夫人臣不幸而值濁亂之時引去不能脫就不

可惟在委蛇而不失其正斯可爲難矣晚世議論苛刻好舉人之短然如公者乘權秉政未行一敗事未害一正人回視同時諸輔何啻霄壤也而兩朝辭疏耿介自持去就之間毫不肯苟吾于李文正之後僅見公矣

劉河空遵憲

劉遵憲字可權大名人甫弱冠萬曆辛卯舉於鄉甲辰成進士令壽張調繁滋陽滋陽當汶泗之交民苦浸沒所謂歲脩止故事耳公儲粟以給夫役身處河

于親爲經理九閱月而堤成迄今享其利戊申陞戶部主事未幾調兵部甲寅爲職方郎職方故弊數也各弁率納賄於貴要而取償於方司公毅然杜絕有中貴人持私牘至門卽據案草一疏奏聞大司馬知而力止之乃劣處其營求者而人卒不敢以一函相及也乙卯遷武德道旋以邊才改甘鎮西寧道攝涼州道其地沙漠不毛甘鎮則孤峙天末番族雜處笳吹馬嘶不絕於耳且軍食久匱戰士饑忿公嚴課衛官大脩屯田飭法風勵之三歲之中四奏大捷未幾

以內艱歸服闋起補大同左衛以缺其鎮功加按察使又加左布政時素囊黃台吉恃其部落挾賞侵邊公陽示羈縻時時遣精銳小創之終不敢逞壬戌陞本鎮巡撫行邊至殺虎堡方值關市番漢雜沓公曰此撫順之續也亟移市於關外邊人便之往例市者售者皆有稅公聞而駭之以戎事需馬爲重猶將名之使來厚稅以奪其利可乎嚴爲禁革乙丑陞兵部添設右侍郎時邊疆多事特設此以待制府經略之用者未幾遷左侍郎視戎政篆旋署部事部中有議

之者曰此昔年爲名職方者於是請託苞苴悉爲屏跡時值五載軍政逆奄魏忠賢姪魏良卿疏授世廟時例乞免考察奉旨下部看議公抗疏爭曰軍政大典祖制行之已久世廟時覓免一次以金吾有大勛故特徵此曠典若臣部所守者祖宗之法今恩典出自朝廷則可非臣部之職掌也旨下照舊考察逆關卿之仲冬寧錦奏捷以公攝部勞晉大司馬管少司馬事公見逆璫虐燄日盛舉國如在遂上疏以侍養請奉有顯係規避之旨或勸求同府相國通意於上

公公佛然不顧。復爲力請。始得予告歸省。依依子舍。杜門不出。崇禎御極。逆闖伏法。庚午。廷推大司空。兩疏控辭不赴。乙亥。再召視水衡。復以疾請不允。丙子。二月。再請三月力請。皆不允。七月。大兵薄都城。守戒嚴。一切守具。責辦頃刻。四司郎署奔走十六門。狼狽不前。公以一身支應工費。稽察堅瑕。食息於睥睨風露。三月始解嚴。十月冬復以病請不允。前此司屬奉差無定序。公痛絕營求之弊。題定差規一以資俸爲序。至一切抵差報滿諸餽獻及監督營繕二八扣除。

諸陋例一時祛盡丙子九月上閱都城獎公勞績計
月考滿上遣中使賜銀鈔廕一子復連章乞歸茂宣
自二月至七月屢以積勞難痊請皆溫旨勉留抵冬
以城守功加太子少保時議幫築外城上限三年竣
事公以九月報完上喜賜銀幣加俸一級是時部事
多艱上責備嚴急諸臣不稱旨者逮斥無虛月刑獄
幾滿公每日時事需才甚殷正宜培養乃過爲摧折
異時誰爲驅策故於諸司屬皆曲意護持不事吹求
以迎上意如錢局墻穴一事屢爲剖白雖嚴旨鐫級

終不坐以莫須有之辜故主事駱方壘等卒從減未
有爲公言者曰聖怒難犯公爲人獨不自爲乎公曰
人之愛其功名誰不如我壞他人之名節以博我之
功名吾不能也且吾位至六卿自謂踰分向來求歸
未得倘因此獲罪去固所願也人服公得大體已卯
復以寒疾乞骸庚辰三月殿試閱卷畢復引年三
辭俱不允是歲饑人相食請救所在有司賑貸上報
可四月召對文華殿賜坐上獎其清勤公賦性恬
每退朝兀坐小室翻書啜茗門無車馬之音署中有

廢亭脩葺之與左右少司空賡和其中名曰友聲亭
時收卜清望屬公有相忌者遂卧不出章十餘上始
得請陞辭之日行李蕭如也公自乙亥任冬官值時
政峻刻諸臣以罪去者六卿中凡三十餘人亞卿中
凡三十餘人內閣亦二十七人而公獨以清端受知
前後八年奉身以退惟公一人而已昔宋臣蒲宗孟
短司馬溫公於神宗前神宗作色曰蒲宗孟爾不足
司馬光耶無論別事朕卽位來見辭職者惟光一人
其餘逐之亦不去矣又錢公若水嘗言上待輔臣如

此蓋無秉節高邁能全進退之臣以感動人主遂貽
上之輕鄙卽請罷若二公者可爲百世師矣余嚮與
劉大司空同朝相善見其宦况蕭然歸請之疏無月
不上彼視一官如逆旅視其歸如久客之望廬舍也
班之二公之間殆無作色哉所著有揮麈亭集雲西
稿籌邊餘咏來鶴樓集會心錄慳心錄恕齋集友
聲亭集歸田小紀

畿輔人物志卷之十三

北平孫承澤著

李閣學標

李標字汝立別號建霞高邑人少時偏儻有大志而
端厚凝重識者已知其爲廊廟器萬曆丁未成進士
讀書中秘布袍蔬食如諸生熹宗時見朝政日非大
半託疾家居及崇禎初御極舊關臣以枚卜請上允
之令吏部會推吏部列名以聞上詔閣臣及吏科河
南道至乾清宮前殿上曰內閣大臣倘得其人社稷

之福朕不敢自定敬求之於天命內臣談香案上躬
拜之置名金瓶中拈得六人標與焉乃由禮部右侍
郎陞尚書兼東閣大學士入閣辦事上初攬大政銳
意太平凡禮樂兵農大政悉於召對時究極其原委
公條奏詳明悉當上意未幾舊輔爲言者論列先後
罷免公哀然爲首益以天下爲已任時同官劉鴻訓
以增勅書事爲御史吳玉所糾上震怒欲寘鴻訓於
重典增勅一事公先有疏叅中書田佳璧於鴻訓實
無與也上威嚴同列不敢申救公乃上揭謂頃蒙皇

上發下票本內有同官鴻訓會議一本臣等展讀一
過愧汗刺芒罔知所措竊惟勅書一節御史雖專指
鴻訓而臣等良心自維實係四人同體之事昨聞會
議疏上方席藻具疏待罪未奉明旨豈敢以事中之
人專輒擬票鴻訓與臣等俱以皇上龍飛之初從淪
落廢置之中首奉特簡綸扉之命躬承眷渥之隆身
叨雲霄之際此等榮遇區區千金萬金孰肯捐以相
易臣等與鴻訓久處疎畧率直誠有之然其入侍宸
嚴山揚主德幸我皇上爲堯舜之君每自詫逢唐虞

之盛者欣喜踴躍其於臣等寔有同情今乃議論交
相剖陳無地皇上悉發會議博採羣言以盡事中之
公論特需恩施優存終始以全事外之國體此惟皇
上自心獨斷如膏澤從九天而下臣等惟有盥沐翹
首爲鴻訓跂恩望德之不暇其敢輒憑臆擬更蹈專
擅之大罪乎上意少解鴻訓得謫戍去又值烏程溫
體仁以會推閣臣不得與出一疏糾與推者之錢謙
益仍執已結浙閩事爲詞上召對體仁又力言諸臣
結黨行私吏科章允儒面糾之謂從來小人爲公論

所不容將公論之所歸者指之爲黨習傳至今爲小人害君子榜樣上大怒竟令錦衣衛逮繫並謙益將有不可測之事矣公上密揭謂人臣比肩事君誰甘以此周營私自處其始或偶因意見之偏而後各乘以好勝之念遂至曹分各立漸成門戶之岐途惟上有堯舜之聖執中建極蕩蕩平平明告戒以風之復爲和德以化之是非非不能辯也而聖明卽止一本大公至正之心賞罰非不盡用也而事過卽融常存有餘不盡之意用能合異爲同漢季爲夫朝端極師

濟之隆海宇受平康之福此惟我皇上乘龍御天乾
體用九之聖人足以當之頃皇上處分錢謙益章允
儒二臣本因體仁之言而體仁乃不安於心具疏求
去則一番剖晰之後當有不盡之法可知矣臣等非
敢借此更爲二臣求寬但願我皇上穆然玄覽少賜
垂仁於謙益或念其事經恩詔姑著回籍於允儒待
其困橫稍久仍許自新使諸臣安體仁與之俱安不
惟安體仁之身實以安體仁之心所裨於一道同氣
之盛治者匪淺渺矣錢與章亦得斥職去然從此黨

議紛紜枚卜之事亦罷適韓蒲州召至公辭首輔已
巳二月皇長子誕生恩加太子太保庚午正月仍爲
首輔二月以冊立東官加少保時以罪督袁崇煥爲
題諸宵小借之翻局甚至錢華亭下獄公乃以病請
未幾烏程柄用而國事日非矣

成文穆靖之

成基命字靖之後以內閣謝事家居始題改字爲名
避廟諱也公大名人萬曆丁未進士改庶吉士授編
脩公在詞林歷十三年而陞中允又歷十年而陞吏

部侍郎始由侍郎而推內閣於進退得失之間蓋漢如也當其爲司經局洗馬管司業事署祭酒疏請視學不先闕白內閣又疏中天子之學名曰辟雍蓋辟者積也積天下之道德也雍者雍也雍天下之殘賊也故古者辟雍禮得謂之泰徵等語內閣弗善遂以原官回局公亦毅然請告癸亥起修光廟實錄爲講官皇太子生以資進禮部右侍郎時逆奄魏忠賢已用事一時附趨熱者在奔如鶩公風檢澄峻正已講筵每自矢曰無負細旃也及衆正羣起糾奄黃門

北寺獄興有中堂指公爲東林黨人逆奄大爲備具
甲子歲終當講筵敘遷止加太子賓客公遂決意去
或爲之謀曰爾樂相公固姻戚也一語可解公不答
第曰講官皇上規繩也規繩不在講官安作皇上規
繩乙丑開講畢卽杜門稱病遂以原官掌南翰林院
印舊無是例也使道歸里再疏請告不允比赴留都
奉旨冠帶閒在公歸而布袍艸履與一二故人文酒
留連致足樂也崇禎御極臺省交薦起吏部右侍郎
以澄敘佐太宰飭諸子曹各舉其職疏請刻訪分

發九卿及三品以上科道諸臣各舉所知明列事款
造冊進呈又言人才自逆奸摧折以來野多佚賢賜
環無幾請將見在諸臣覈停陞轉缺出先儘起廢半
年後仍兼行酌用又言臣部以用人爲職祇苦意見
之不同遂致取舍之無據從此各祛成心共偕大道
將世宙不難蕩平上報可允行未幾大兵次薊上名
平臺講求方略公上言帷幄決勝允賴大臣舊輔孫
承宗才兼文武爲人推重且去都不三百餘里亟宜
召用以資謀斷軍旅之學別具材品樞員宜增如嘉

靖時例增設七八員以資任用軍國煩重講議不可
無若借題生議橫滋囂競固不如瑱耳之爲愈卽一
切會議徒費商確宜勅部慎擇條議薦舉鑿鑿可見
施行者立與題覆其餘游譚浮說盡戾勿問從古濟
變以人凡抱文武才猷經濟實用者勅廷臣指名奏
聞分發吏兵二部諮試擢用上皆嘉納先是兩舉枚
卜廷議皆首推公至是始得旨陞禮部尚書入閣辨
事時孫公承宗於十一月十一日召至京上御平臺
同召對公奏願以戰守機宜盡付承宗使盡其才必

能仰副聖衷時庶吉士劉之綸好譚兵有吳閫髮僧
申甫者詭譎兵事之綸誤信之薦之朝上拊髀方殷
適之綸當陞泣陳而甫有橫行之請曰募生兵置衝
卓上壯之特從其請公奉命詳閱極言不可用上默
然遂越格授兩人官而甫竟見教而潰東兵薄城表
崇煥率祖帥入援崇煥先殺毛文龍文龍私人在都
者已廣布流言督師又請羅城休兵讒口益力十二
月初一日上召袁崇煥祖大壽對平臺上數崇煥罪
狀命錦衣衛拿下公晚大壽而心悸獨叩頭乞慎重

者再上不悟曰慎重卽是因循何益公復叩頭曰臣願皇上慎重敵在城下非他時可比上見其狀急遽曰卿慮的亦是朕意已定不必言上退以茶盒賜輔臣時首輔韓爌饑甚將取一餅入口公憮然曰此何時老先生尚欲食耶我輩寧卽引決不忍見國勢至此怏怏而出明日祖營兵潰擁其帥而東舉朝惶駭司禮監監臣執公手公料已定今柰何遂奏以崇煥手札招大壽東兵南下諸事紛紜公劾劾在公因念急時紛名外兵而已來未定方來當止京營乘城之

士宵旰不得下宜分班休息之宜雲之勁卒入衛仍
當招補原額以備西邊又念調集費繁額賦當急東
糧當運明年領兌續運之法當行又念司空之屬收
發辦造當晰當速戰車當補料價當先期以應又念
六科表裏六曹舊有註銷之規各科印官各選委一
員查核號件不必以議論掣任事之肘第欲以糾彈
悚懈事之心上俱嘉納復自陳無能乞罷者三不允
上重漕事遂議復用漕運勲臣而諸勲紛出攘臂蓋
祖制設官甚善而一二不肖或致削軍蠹漕公具以

聞上爲報罷一日上御文華殿謂輔臣近來法紀廢弛力宜振刷公對以治道第宜去其太甚譬理亂絲宜覓頭緒驟用紛更恐益撓亂上曰慢則糾之以猛何妨公默然其後輔政者陽以振刷逢上意而陰操威福除異已議論日新禍亂日甚然後服公謀國之遠也時首輔韓爌次輔李標俱去公獨留東兵尙在遵永大司馬梁廷棟志總理帥馬世龍謀更置之將以撼閣部承宗也公力破羣忌從中調劑救世龍進取不當更置世龍卒隨閣部監遵永之功時通津告

急公特請申嚴警備仍請補天津鎮帥請發銀通鎮募土著足額專遣科臣省閱奏報上皆允行至議固根本則請用三鎮重臣如范侍郎景文侯侍郎恂解巡撫經傳治兵以壯聲援又念司馬調發不得專兵而四方倚兵爲驕幾如藩鎮公請得一中樞大臣親提勁旅以彈擊驕悍上悉允行固原兵入援而槩公密奏設法督選萬人而給郵押其餘還鎮令鎮臣捕首諱者正法上方銳意精嚴大小臣工相繼就繫如張尙書鳳翔喬尙書允升胡尙書應台韓尙書繼思

公爲反復申理俱得從寬典易副憲逮下詔獄公執
奏改下刑部又如御史李長春給事杜齊芳以私書
奉旨會官處決公上疏救之不報乃長跪會極門謂
祖宗之法雖真正死罪猶必三覆奏豈有詔獄一訊
未經刑部而遽處決上使人偵見其長跪自辰至酉
未起也意解俱得謫戍主事李逢申祭公向爲袁督
乞慎重乃受線索欲出脫其罪公再疏請告慰留視
事無何逢申以炸袍同徐申懋擬遣而上嫌輕公謂
大辟下卽遣而永遣又遣之重者兩人文墨書生未

請約束以致違誤非有他也求之外無可加上亦從之公以偶忿不入直適有表督議罪之事錦衣張道濬糾公委卸又主事陸澄源論公兩首廷推乃首輔熿欲借公以申救崇煥公再以病請疏三上乃得允先是詞臣文震孟疏劾冢臣上御批挾私妄詆不堪講官公揭謂震孟實以才名氣節素負時望今被此訶謔覺於講幄之體太失且於冢臣和衷之願不安衆人側目實始於此矣公歸閣事紛紜無人不望公再出而公方在門課子陶陶然樂也公以己巳十一

月入閣以庚午八月予告又六年乙亥八月發贈少保謚文穆嗚呼平村亂豈不以人哉文穆受事於危急之日而首勸上起用高陽寄以軍旅可謂獨見其大矣及大敵在門遽逮渠帥勁旅東潰事已瓦解非公在內高陽在外宗社之墟不待異日也未幾公去而高陽亦去溫烏程因枚卜而爲攘臂之爭希首揆而爲同穴之鬪日以慘刻之術中人主而陰除異已者於是一時才德之士不在囹圄則在山林上環視左右實無人焉於是不信大臣而信已意不任外僚

而任中涓以至於公則公之一去所關蓋甚鉅哉

范閣學景文

范景文字夢章別號質公甫弱冠卽以文章著譽萬曆癸丑成進士授山東東昌府推官署其門曰不受囑不受餽人呼爲二不公時值旱蝗人相食公發粥賑以活道殣置膳田以息殘更條捕蝗十議以拯災黎歲稍豐則勸所屬入穀抵銀以積倉廩革大戶以甦里甲除馬戶以清郵傳東昌大治己未擢入爲吏部主事清真端亮爲周太宰加謨所知一切疏稿俱

出其手至天啟五年典選一疏尤爲侃侃大譽言今
天下仕路舉國如狂嗜進如鶩毋亦衡鑒之地先自
不清而欲其恬漠寡營詎可得乎竊念除者有歲格
其久近不得而私也遷者有資勞其深淺不得而私
也特擢者有勳望其高下不得而私也今與需次諸
臣約一行請託臣不能爲之諱又與同事諸臣約一
聽請託亦願需次諸臣勿爲臣等諱以天地人才爲
天地惜之朝廷名器爲朝廷守之天下萬世是非公
論與天下美之人還其人我無失我此臣心可自信

時魏忠賢黨羽視吏部爲外府疏出大恨之公一日
閱選人姓名齒舌本噴血漬地類中惡者遂請急歸
公父諱秉年爲南寧守謝事歸居南都豫告所知曰
吾有子必不爲貽監作奉行吏勅家人掃徑以待未
幾果黷公初入部日袖小冊旁求舊德泰昌元年八
月公署選事適枚卜闕員公首言舊輔葉向高天篤
忠貞以資匡弼應候特旨召用其廷推者八人自何
宗彥劉一燝韓爌外則原任禮部右侍郎孫慎行詹
事府少詹盛以弘衷部尙書周嘉謨都察院左都御

史張問達大理寺卿鄒元標一時翕然稱快未幾給
假去及再起甫兩月又去時周忠介順昌以黨禍被
逮銀瑄就北司獄誣賅數千公洗橐百計代償與脫
之於死風聲所播幾及於禍公處之自若弗恤也時
輔忠介行者爲吳中諸生朱祖文言虐箠如火時急
拯林之義者惟范吳橋鹿定興父子耳丁卯起太常
寺少卿不赴崇禎戊辰冬再推補己巳七月擢右僉
都巡撫河南旣而有兵事京師戒嚴公不待詔命帥
師入衛各處援兵逗遛騷驛獨中州之兵抵涿叢早

而紀律嚴明民不苦兵上使人慰勞之加兵部右侍郎團練通州壬申內艱歸甲戌十月起南右都御史掌院事乙亥陞南兵部尚書時流寇自豫趨廬自鳳趨池又自和趨浦南額兵八萬人堪戰者不滿萬人定營制簡家丁治樓船練兵器壁壘煥然一新其大指以爲非戰無以爲守非守江無以守陵守京非守江北無以守江南以池河衛關山以關山衛滁浦宿重兵於廬遊兵出英六之間東據鳳泗西應皖楚南控江北扼淮此其以守爲戰之大局也賊烽夜照江

水不能以片羽飛渡公之功也時楊武陵嗣昌以本
兵檀國柄方欲以和撫二字塗飾目前公每嘆曰賊
勢日橫國事日蹙乃徒爲掩耳盜鈴之計爲人臣子
何忍負之一至此也輒唏噓扼腕寢食俱廢而又值
嗣昌聞艱奪情觀事詞臣黃道周魏義爭諍及科臣
何楷等連章糾劾上震怒罪繡纍纍公抗疏力陳謂
道周等國家有數人物用之猶懼其晚棄之何得其
益乃共推碩果遂嗟抱蔓殊堪惋惜疏上革任中外
一時瞻之如山斗公居南中招集名士與之詩酒留

連人謂清真逸少風流安石公兼有之壬午八月起
刑部尚書十月改工部尚書蓋以時方告警欲公料
理守具也甲申二月以原官兼東閣大學士每召對
公條議詳切而出之以雍和然上方嚮意用魏通州
藻德而陳井研演密與相結納猶以朋黨之說固上
寵上傾心信之於時如公與倪公元璿李公邦華輩
皆在列而救過不遑一籌莫展又時政自溫烏程體
仁當國後刑獄日煩士紳以事羈繫者恒滿刑科給
事孫承澤同張可危忻謁陳井研於朝房謂獄中諸

臣幽囚已久爰書已上求其速發而情有可憫者求
爲護持陳作色曰如公所言某某者上怒不測豈可
輕試部科相對錯愕承澤曰明主可與忠言我當以
疏爭之於是上言時事多艱人才難得邇年內外諸
臣任事不效輒麗法網或膏血沙場或駢首西市不
則遠禦魍魎幸則星沉貫索以致臨事需人屍壘俱
空襟肘交困因請赦樞臣張國維樞臣董象恆郭景
昌科臣姜燠方士亮部臣尹民興等疏上次日上御
文華殿召閣臣及刑部諸臣出疏示之衆嘿然公獨

出班頓首曰此臣正欲奏而未及不謂該科先之也
激切言諸臣無大罪張國維向年撫蘇松深得民心
總理河道疏通餉運有功國計景昌起用於戎所不
遑往家卽於本處鄉官借貸招募死士從間道抵楚
以期一當不謂遽從逮繫上聞之憫然問景昌今何
在公對在獄中又問姜埰一案刑部何以不結張忻
奏已具疏三月矣上使司禮監取疏無有因令該部
補本行而國維景昌俱起用公又虞上反汗也奏曰
皇上宏開法網一時叨寬政者六人此皇上之仁也

願卽出一諭傳示海內至科臣疏次日發部止云該部知道足矣上喜卽出一諭公善於格君如此惜時事已迫無可措手時邊臣請策兵入援張司馬亦力言于閣公大然之陳演執一寸山河一寸金之說堅不肯任無何賊屠榆林破宣大至三月十六日抵城外土城關十八日破外城司馬亟上縋賊上城一疏不省十九日都城破公先已絕粒不食至是見賊騎縱橫望闕哭拜於雙塔寺寺傍井中歿之所著有味玄堂稿南樞志大臣譜武功編諸書又刻趙忠毅文

集孫愷陽先生集行世公羸弱不勝衣詩文秀遠下
語如畫每閉戶焚香或執麈清談望之如三吳韻士
及策敵臨戎暇整有節制雖名將所不及至大義所
在議論侃侃百折不回絕不類其人人每擬之如子
房長源論其末境恐二公有不逮也